



AWE MUNDO TA DESPEDI DI UN GRAN ARTISTA ARUBIANO



Awe mundo ta despedi di

Un gran artista Arubiano, Boney M., kende semper tabatin Aruba den su curazon

AWE, diasabra, lo tin un ceremonia pa conmemora e fayecimiento di un Arubiano di higr y curazon, Bobby Farrell, (Alfonso Farrell), kende a adopta su nomber artistico, Boney M. na edad di 60 aña. Boney M. a fayece na St. Petersburg, Rusia dia 30 di december ultimo, despues di a duna un presentacion pa cual el a haya un standing ovation, manera cu tur hende tabata sa cu tabata su ultimo presentacion.

E ceremonia awe, ta stipula pa 11 or di awe mainta, y lo tuma lugar na Amsterdamse Schouwburg cu ta keda na Leidseplein. Pa 12 or exacto, e ceremonia lo cuminsa, pa cual tur hende ta invita. E entiero mes lo tuma lugar den priva, segun informacion duna pa Stichting Progreso-Rotterdam. Nos a haya un bunita YouTube traha, Alex Alberto, kende hunto cu Robby Schouten, un gran amigo di e difunto a traha na memoria di Boney M., kende manera menciona, ta un Arubiano di higr y curazon. Den tur su presentacionnan, nomber di Aruba ta keda menciona, haciendo enorme propaganda unda cu e actua. Boney M. ta un berdadero Embahador di Aruba, sin nunca a haya e reconocimiento aki oficialmente.

Riba e YouTube aki traha pa Alex Alberto, como un tributo na Boney M. por mira algun actuacion di Boney M. Manera Robby Schouten a relata n'e ocasion aki, cu aki ta trata di un di e artistanan mas grandi cu Aruba a produci. Un persona cu a actua practicamente na tur continente. Pesey tambe, dia cu el a ser descubri morto den su kamber di hotel na St. Petersburg, corantnan grandi di Inglatera, Rusia, Hulanda, Alemania, tabatin e noticia aki riba na prome pagina y grandi



scirbi, unda Boney M. a ser califica e leyenda di Aruba.

Boney M. a conquista mundo durante añanan '70 pa '80 hunto cu e famoso grupo ABBA, kendenan hunto a haya fama. E tempo ey caba, nan a actua na Rusia, unda e no tabata permiti pa canta e cancion Rasputin, kende a bringa e Czarnan di Rusia. E anochi cu el a termina su show na St. Petersburg, el a canta e cancion Rasputin, y manera ya menciona, publico a lanta bira loco y a dun'e un standing ovation. Di aki Boney M. a retira bay drumi, sin a lanta nunca mas, siendo e tabatin un compromiso su siguiente dia na Italia. Manera Robby Schouten a menciona, Boney M. a fayece cu tur honor. Maske manera tur otro artista, tabatin su down den bida tambe, ya cu el a cay den droga, tabata huma masha hopi, pero el a recupera di e bicio aki.


Boney M. prome di tur actuacion, unda e bay, ta papia di Aruba, bisando e.o.: "Mi cas ta bo cas", y e ta bisa esaki na Pa-



piamento y ta traduci esaki n'e idioma n'e pais unda e ta actua. Bobby Farrell a nace na Aruba, dia 10 di october 1949 y cu edad di 16 aña a bay Europa, unda el a cuminsa cu su bida artistico na Hannover, Alemania.

Bobby Ferrell e.o. a ser descubri tambe pa Robby Schouten, ganando bon placa y asina a haci su prome entrevista y despues cu 4 aña pasa. De facto e prome actuacion di Bobby Ferrell, tabata cu mesun Robby Schouten como 45 aña pasa na TeleAruba, tempo cu Robby Schouten tabatin su show na Aruba.

Manera menciona Boney M. a recore mundo, den un periodo di mas di 35 aña di artista. Asina el a bay varios pais Asiatico,



Europa, Africa y te hasta na Siberia.

Boney M. a bira e artista Arubiano mas famoso e.o. na Europa. Su conseho pa tur Arubiano ta: "Si ami por logra, abo tambe por logra".

"Rubianonan, mi a stima boso tur", tabata un di su ultimo

mensahenan. Awe lo tin e ceremonia na Amsterdam, unda lo spera un cantidad di hende pa bisa Boney M. danki y te despues.

Nos kier a expresa nos palabranan di condolencia na su famia, y cu Boney M. sosega na paz.